



# Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 3 Yangia anidakangma : Tir Yimyim

tiryimyim@aolima

tir yimyim TAPAK 7

Exit Polls ajanga asadngtetbaji onoki magizüker: Basavraj Bommai

Pakistan SC-i NAB dang Khan ghonda ka tsüngda okadaki anir arutsü tuyu



VOL. XX NO. 209 (ADOK 209)

DIMAPUR

ROGONÜ (FRIDAY)

MONUPII (MAY) 12, 2023

₹ 5.00

## State nung shisaliok asenden-shitsü workshop ka ayongzüka agi

**Kohima, Monupii/May 11 (TYO):** Nagaland Education Mission Society (NEMS) Samagra Shiksha Nagaland ajanga May 11, 2023 nü Post National Achievement Survey (NAS) 2021 aser Foundational Learning Study (FLS) 2022 atema anogo ka workshop agia liasü.

Iba workshop ya Capital Convention Centre, Kohima nung agi, kong Commissioner & Secretary for School Education & SCERT, Kevileno Angami-i ashiba agi, school ecosystem nung School Education Department aser SCERT amdaka lir aser tanur nem shisaliok agütsütsü aser anagazükdaktsütsü asoshi nükjidong yur inyaker.

Tanurtem lenmang shidak nung aniteta tangatetba tajung aliba senso tajung ka-ka kumdatsütsü atema ajaki inyaker, ta lai ashi.

Government school tem indang jembidang, kaketshirtem ya tesayur, administrator aser ano curriculum, syllabus, textbooks aser angazükdaktsütsü yimyatem nung ajemdaker ainer, ta lai ashi.

Anungji government school temi takok anguba asadngtsü teti tongtipang lir, anungji private, government mesüra central school tem asadngtsü asoshi National Achievement Survey (NAS) ya lir, ta lai ashi.

NAS ya linük nung education system indang health asadngba ka lir, ta lai ashi.

Nagaland nung NAS ya government school tem indang ketdangsur aser tesayur temi inyaker, kong private aser government school 910 nung tesayur 5507 aser kaketshir 28995 densema lir.

School balala nung subject balala nungi angazükbä indang NAS ajanga nguteta lir, ta lai ashi.

Foundational Learning Survey (FLS) indang jembidang, tetenzük (foundation) nung tashi maitba ajanga Nagaland nung

school-i maor tanur aika lir aser secondary level nung tatem tonga mezüngteti anener jenti lir, ta Kevileno Angami-i ashi.

Grade-3 nung angazükbä asadngtsü atema kong tesayur 146 aser tanur 669 aliba school 75 shimtet aser parnoki angazükbä nung tetsüngta adokba jangjateta tanur nem azüngtsü angazükdaktsütsü asoshi nungdakba mera agir, ta lai ashi.

Anungji education administrators, managers, coordinators aser heads of schools ama school nung parnokji tanur anepalurtem lir aser education ajanga tanur nem ecosystem tajung agütsütsü parnok dak keta lir, ta lai ashi.

Iba sentong indang nükjidong nung rangloker jembidang Director, SCERT Nagaland, Keviraleü Kerhuo-i ashiba agi, NAS ya kaketshir temi angazükbä linük tesem ajungalen survey agiba ka lir, koba Ministry of Education ajanga education system asadngtsü asoshi renem.

FLS nükjidong ya Primary classes nung Universal Foundation literacy aser Numeracy nung takok angutsü aser tanur ajak azüngba, züluba aser züngdangba nung 'grade level competencies' katettsü asoshi lir, ta lai ashi.

NAS aser FLS bushitetba ajanga linük tesem balala aser state shia kaketshir temi angazükbä noksa tejangja sayur aser kaketshir indang shisatsü, skills aser mapa balala inyakba tali tejangjaba nung angateter aser sentong yanglur nem shisa agütsür.

NAS ya linük tesem ajungalen November 13, 2017 nung government aser sorkari teyari agütsüba school tem nung classes 3, 5 aser 8 nung Mathematics, Language, Social Sciences aser Science subject tem nung agia liasü, ta lai metetdaktsü.

(Maneni tapak 8 nung...)

## NFHRCC aser lokti balala senden amentsü

**Dimapur, Monupii/May 11 (TYO):** Nagaland Foothills Road Coordination Committee (NFHRCC) senden April 29, 2023 nü amendang pangzüng renemba lepa repranga jembishinütsü atema Foothills Road yangluba nung sendaka aliba lokti aser tentet balala - Divisional EEs, PWD (R&B) densema PWD (R&B) nungi ketdangsurtem, Contractors Firms, Dimapur nung aliba

Tribal Hoho ketdangpurtem aser Committee züngsemtem senden ka May 13, 2023 anepdang 10:00 ako nung NFHRCC Base Office, Kher Mahal, Dimapur nung amentsü, ta NFHRCC sangdong ka ajanga ashi.

Anungji tekalen shia aliba ketdangsurtem ajak iba senden nung medema arua adentsü ayongzüker, ta sangdong ajangasa ashi.

## Atsü-apong kasa pur kibong akumtsü memolunger: MLA Azo

**Dimapur, Monupii/May 11 (TYO):** Atsü-apong kasa pur kibong kumdaktsütsü dak sendakba ken o India indang Supreme Court nung jembir. Iba ken o ya kanga tepenja lir aser putu aika liyonga arudang amshiba yimya aser tamendak dak timtem jenti agütsütsü, ta MLA & Leader of NPF Legislature Party, Kuzholuzo (Azo) Nienu ajanga sangdong ka nung ashi.

Supreme Court ajanga tetsür o tetsür aser tebur o tebur kibong akumtsü/apuani süa alitsü memelatsüla, ta ni aser Naga People's Front (NPF) tangatetba. India sorkaria shidak nung 'same-sex marriages' anema nokdak, ta ashi.

Naga customary law mesüra Khristan yimsü densema meteta aliba tamangba yimsü kecha nunga tetsür-a süang mesüra tebur-a süang, kasa atsü-apong den kibong akumtsü mela mali, ta Azo-i ashi.

Putu aika shisatsü angudak tamangba yimsü indang institution tem nung iba amala tesendaktep melidaktsütsü

nokdangba atema kuli balala lir, ta pai ashi.

Lipok nung shia ali ama, kiyimba ya Tsüngremi mezüja shimetba, tebur ka aser tetsür ka tsüngta züngzüktepba tesendaktep ka lir. Mathi 19:4-6 nunga Teyangluri tetenzük nung tebur aser tetsür yanglu aser iba yongji tebur pa tebo aser tetsü yutsütsü aser pa kinungtsü den ka kuma lungjemtsü aser tena shi nung ka akumtsü, anungji parnok ana masü saka shi nung ka dang, anungji Tsüngremi kechi lungjemdaktsü aser nisungi tepiladaktsü ta shia lir.

Lai nung shia aliba den sako Naga nungeria akhi alemli mapang nungi tetsür ka aser tebur ka temeshi nung lungjemba kibong nung amanga aru, ta pai ashi.

Anungji kechi ken o benoka ali, ibai tamachi aser putu sa putu amshiba shisatsü anema kisüng masü saka Nagaland aser India aser alima nung bilemba aser amangba anema lir.

Atsü-apong kasa kibong akumtsü asoshi ozüng agi meladaktsütsü merangba nungi

asangsang nung timtem ajurutsü indanga asenoki metettsüla, ta Azo-i ashi.

Shiba tebur mesüra shiba kinungtsü ta atsütepba yong, palalulaba mapanga senmangren aser tanur dak sendakba nung India nunga ozüng aika yanglutsüsa akumtsü. Iba yagi tali tepenja adoktsü aser temzüng-ozüng penjar aliba bentettsü ang tasakba asütsü, ta Azo-i ashi.

Naga customary law nung iba amala temelenshi ya tamakoktsü asütsü.

Atsü-apong kasa pur kibong akumtsü ozüng nung meladaktsütsü merangba ya shisa makar mapa aser asangsang nung tamakoktsü asütsü. Supreme Court ajanga totuyuba ka agütsüba sülen India nung 2018 küm ozüng agi 'homosexuality' mela aser ibaji aikati kanga sashia anema nokdakaka agizük. Ajisüaka atsü-apong kasa kibong akumtsü melaba ajanga nüburtemi maginütsüsa tensa tali ajurutsü ama NPF nükla dangi arur, ta MLA Azo Nienu-isa ashi.

## Cannes Film Festival nung Naga nunger ana adentsü



Kivini Shohe



Andrea Kevichüsa

**Dimapur, Monupii/May 11 (TYO):** Nagaland nungi film tsütsü nungtugu nisung ana, Kivini Shohe aser Andrea Kevichüsa, Cannes Film Festival 2023 nung adentsü, koba May 16 nungi 27, 2023 anogotem alitsü renema lir.

Tena ya nungloksüba ama Nagaland tenüng nung aotsü, koba Department of Information & Public Relations ajanga Ministry of Information & Broadcasting, Government of India-i yaritsü, koba Nagaland state nung films aser iba dak sendakba nung nodal department lir.

Kivini Shohe ya Nagaland nungi yanglur tejangja nübur ka lir aser Nagaland nung mezüng film yanglurtem rongnung ka lir aser Film

Association of Nagaland (FAN) tenteter rongnung züngsem lir. La ya 14th International Documentary & Short Film Festival of Kerala 2022 nung Jury Chairperson aser 5th South Asian Film Festival, Kolkata 2022 nung Jury (tetendanger) liasü.

Shohe ya film yangluba atema Arts nung Governor's Award 2014 ajangteta lir aser lai Naga 'transgender' asem indang otsü nung yangluba 'Oh my Soul' (2014) film asoshi sempet ngua lir.

La indang documentary aika nung Nagaland anüdoklen atalokba otsütem nung kongshir aser lai Under the Longfuru Sky (2018) aser The Great Anghs (2001) documentary yanglua lir.

Lai Sumi nunger tetsü-tebou otsü nung ajemdaker yangluba

Winter Nights dream (Nisapa & Nisala) 2003 aser Anishe Flower maiden (Anishe Xamunu) 2007 short film direct asü. Lai yangluba film tatembangbaji Even the Dead Speaks (telefilm) 2019 alitsü.

Andrea Kevichüsa ya India nunger model aser Nagaland nungi actor ka lir. Lai 2022 küm Anek film nung Ayushmann Khurrana den mezüng shilem agia liasü aser lai Filmfare Award 2023 for Best Debut (Female) sempet angu.

Kevichüsa ya fashion designers aser brands tulu aika den inyaka aru. La ya Vogue India, Elle, Femina amala kaket indang 'editorials' nunga adokoko aser Filmfare, Harper's Bazaar aser Grazia indang cover nunga adoka lir.



**Er. M. Toshi Jamir (Chungtia)**

2 October 1966 - 6 May 2023

In life we loved you dearly,  
In death we loved you still,  
In our hearts you hold a place,  
That no one can ever fill.

It broke our hearts to lose you,  
But you did not go alone,  
For part of us went with you,  
The day God took you home

## MULUNG NEN O

*Temeimi nü taküm kümzüktettsü asübo,  
Na kodanga mesüla.*

Ozü temeim obala, jabaso aser adianu M.Toshi Jamir iba lima nungi pilaa orr, onok mulung kanga kurema pa mangyima amunger. Pa dak aketba tesungjem aser jangratem taküm yimya onoki teti menunggraa bilemtettsü.

Pa shiranga alidang aser pa iba lima nungi pilar, onok mangyim jashi timtem tia nung alidang, onok dang aria bilema yariteper kija kibong, tembar medemertem aser temeimertemi inyakba mapa tajungtem onoki teti bilemtettsü. Nenok temeim mapa tajung asoshi kecha agia masadangtetba tepela tulu onok mulungjang nung lir.

Ano, ozü kinungertemi Toshibai kanga meima züngshiba par telok OBASSI aser NIC purtem mapa tajung bilemteter aser parnok dang pelaba shisemer.

**Nenok ajak dang onoki kanga pelar.  
- Temeim Kinungertem.**



AH & VS Department ajanga  
AA, PIO & APIO shimogo

**Dimapur, Monupii/May 11 (TYO):** Nagaland Governor ajanga RTI Act, 2005 indang Section No. 5(1) nung mela aliba ama tsunglanglen agiija aliba ketdangsurtem Appellate Authority (AA), Public Information Officer (PIO) aser Assistant Public Information Officer (APIO) ama Animal Husbandry & Veterinary Services (AH&VS) Department nung shimogo.

Appellate Authority (AA) ama inyaktsü atema Vikheyie Kenya, Commissioner & Secretary, AH&VS shimer, Public Information Officer (PIO) inyaktsü atema Sangmai C. Imlong, Joint Secretary, AH&VS aser Assistant Public Information Officer (APIO) inyaktsü atema Moalila, Deputy Secretary, AH&VS shim.

## Agar/süngya dak sendakba seminar ka Tuli nung agütsü

**Dimapur, Monupii/May 11 (TYO):** Nagaland Ecological & Sanitation Management Society (NESMS) ajanga May 11, 2023 nü Mokochung district kübok Aitlenden ward, Tuli Town nung "Promotion of Agar Wood Plantation in North-Eastern Region of India" nung seminar ka ayongzüka liasü, koba Ministry of DONER, Govt. of India kübok North Eastern Resources Community Management Project, NEC Shillong ajanga sponsor süa liasü.

Iba seminar nung NESMS Co-ordinator, Temjen Jamir-i NERCORM aser NESMS indang metetpelaba mapang agia liasü.

Iba sentong nung shisalen sayur ya Forest Department, Tuli Range Office, Government of Nagaland, nungi P. Samalemzung (Forest 2) liasü.

Shisalen sayuri iba sentong nung ashiba agi, Agar wood (süngya) dak teronem balaka aliba ajanga alima nung jenjang tulu aketba 'natural raw material' ka ta züngshir.

Iba süng indang scientific tening Aquilaria Malaccensis alitsü aser India nung tabu 21 angur.

India nung kanga bulua anguba tabu asem indang pai rasaa ashi aser tabu asem rongnung Nagaland nung Aquilaria Crassna ya tajungtiba lir, ta pai ashi.

Süngya ya ali takong nung tajungba adoker, kanga tebungba aser atsüktü majung, ta pai ashi.

Iba süng junga aintsü asoshi tesem satema yutsütsüla, nursery plant ya polybag nung amshitsüla, süngtong atemdang ponglanglen aliba tera indoktsüla aser yamaji inyakba ajanga tekeraba ainer, ta pai ashi.

Pai iba seminar nung adener dang süngya lu ayimba ya profession ka kumdaktsütsü ajungshia liasü.

Iba sentong nung Forest Department nungi ketdangsur asem, süngya lu ayimer nisung 21, aser NESMS staff tem dena liasü.

## Noklak nung Nagaland State Co-operative Bank semzükogo

**Dimapur, Monupii/May 11 (TYO):** MLA & Chairman DPDB Noklak P. Longon ajanga May 11, 2023 nü Noklak nung Nagaland State Co-operative Bank (NStCB) semzükja liasü.

Iba bank semzüktsüba sentong nung jembidang, Kiamngan ward, Noklak town nung lapokba NSCB ya branch 22 buba lir aser Noklak nung aliba nüburtem asoshi alizüng tasen ka tongtetba alitsü, ta MLA P. Longon-i ashi.

District indang rongsenketzüng ya aluyimba dak sendakba maparen nung ajemdaker lir aser Nagaland State Co-operative Bank lapokba ajanga rongsenketzüng nung tashi aittsü aser district kübok jila aser yimdak yimtsüng nung aliba nüburtem jenjang ajungkettsü, ta pai ashi.

Pai nüburtem dang iba bank nungi loan agitsü aser mapang shidak nung menoktsü ayongzü. Bank ketdangsurtem dang nüburtem jenjang ajungkettsü asoshi lenmang sayutsü ajungshi aser district nung aliba nüburtem dang Nagaland State Co-operative Bank nung account lapoka bank teyari agitsü P. Longon-i ajungshia liasü.

Paisa district nung aliba nüburtem dang bank nungi agir mapa meranga inyaktsü aser business tenzüktsü ajungshia liasü.

Noklak nung Nagaland State Co-operative Bank indang branch 22 buba lapoktetba atema MLA Benei M Lamthui-i tejenpur aser lokti tentet balala dang pelaba lemsatapa liasü.

Iba Bank ya senotsü amshitsü atema kisung masü saka income arutsü aser takum alitsü asoshi lenmang ka lir, ta pai ashi.

Pai nüburtem dang NStCB ketdangsurtem den amalitep akatsü aser teyaria shidak

agitsü ajungshia liasü. Iba sentong metenzükang Benei M Lamthui-i Noklak Town nung NStCB indang ATM booth ka lapokja liasü.

NStCB indang Managing Director, Bendangnungsang-i iba sentong tenzükja jembidang, NStCB ya customer tem rongsenketzüng tsütsü takok anguba nung yaritsü aser senotsü kumzüka yutsütsü asoshi lir, ta ashi.

Social Security Schemes indang rateta jembidang pai account alir aser customer ajak dang social security scheme lapoktsü ayongzüka liasü. Paisa Cash Deposit Ratio aser Non-Performing Assets indang nunga jembia liasü.

Noklak Town nung branch lapokba atema Deputy Commissioner, Noklak, Arikumba-i Nagaland State Co-operative Bank Ltd dang pelaba lemsatapa liasü.

Tetenzüklen staff temi timtem balala ajurutsü akok, saka akokba lenmang ajak nung yariteptsü molunga lir aser nüburtem asoshi mapa tajung inyaktsü atema nüburtem dang lenmang sayutsü, ta pai ashi.

Pai district nung aliba nüburtem dang iba bank staff tem den amalitep akatsü ajungshi aser bank nung anguba facility tem amshitsü aser pei indang ama anepalutsü ayongzüka liasü.

Iba sentong nung Vice Chairman, NStCB, Kexhwengulo Lea; president, Khiamniungan Tribal Council, M.Thango; taoba vice-president, Khiamniungan Tribal Council, L.L Buming aser president VDB Block Union, Panpan nungeria o jembia liasü.

Iba sentong nung menden General Manager, NStCB, Jonah Sema liasü aser Jt. RCS, Tuensang (i/c ARCS, Noklak) Chume Chang ajanga melezüng o jembia liasü.

## Kohima district kübok immunization nung temolung agütsütsü pangjem

**Dimapur, Monupii/May 11 (TYO):** Routine Immunization (RI) aser MR Elimination drive atema District Task Force for Immunization, Kohima District senden ka May 10, 2023 nü Deputy Commissioner, Kohima indang Conference Hall nung mena liasü.

Iba senden nung SMO, World Health Organisation (WHO), Dr. Sheila Longkumer-i Kohima district kübok Routine Immunization (RI) indang osang tongmelang agi agütsü aser tang tashinung immunization agüja aliba indang

osanga agüja liasü.

Mobilizers (ASHA) worker peria maliba aser junga ketdang masüba ajanga timtem balala ajuruba indanga lai lemsatep aser züngsem aser line department tem dang yaritepa nukjidong tongtettsü ayongzüka liasü.

DPO (RCH/UIP) Dr. Khrievilhou Nakhro ajanga Kohima district nung RI aser MR Elimination indang osang agütsüba mapang, immunization mezüng noklem April-May nungi tenzükogo aser tanabuba noklem August-September 2023

nung tenzüktsü, ta ashi aser nukjidong tongtettsü asoshi züngsem ajaki maneni yariteptsü ayongzüka liasü.

Kohima district kübok yimdak-yimtsüng aser jila balala nung immunization junga agütsütsü asoshi sendaktepa aliba department ajak lungjemer yaritepa inyaktsü iba senden nung telemtetba agia liasü.

Iba senden nung menden Addl. Deputy Commissioner Kohima, Rhosietho Nguori liasü aser CMO Kohima, Dr. Tumchobeni-i melezüng o jembia liasü.

## Dimapur nung dangar dak tsüker ajener nisung ka apu

**Dimapur, Monupii/May 11 (TYO):** DMC Tool Tax, Burma Camp, Dimapur nung May 8, 2023 aonung gari agi dangar dak tsüker ajenba atema Dimapur East Police Station nung ken o benoka aliba dak sendakba nung, highway nung tesem balala nung CCTV camera indoka

aliba aser 3rd Mile, Dimapur nung traffic police ANPR surveillance camera inoka aliba nungi iba lendong agütsüba gari ya jangjateta liasü, ta Dimapur Police sangdong ka ajanga ashi.

Iba lendong agütsüba gari Bolero Pick-up (B/R No. BR06GE 6956) ya Newfield

Check Post nung traffic police temi apu aser gari anisang arishi küm 20 tain Bishnu Darjee, S/o Dilip Darjee V/o Tal Balijan, PO/PS Bokajan, Karbi Anglong, Assam ya pua maneni bushisüngdangtsü atema Traffic Control Dimapur nung yua lir, ta sangdong ajanga ashi.



May 11, 2023 nū Jantar Mantar, New Delhi nung Haryana nungi Centre of Indian Trade Unions (CITU) züngsemtemi longkak aiter wrestler tem pusema longkak aitba noksa nung angur.

### SC obendang sülen AAP sorkari Services Secretary anentsüogo

**New Delhi, May 11 (Agencies):** Brihostibarnü Supreme Court-i Delhi nung officer tem transfer sütsüba aser posting lezmüksüba tashi AAP sorkar nem agütsüba sülen ghonda ishika dang lir Delhi sorkari Services department nung secretary, Ashish More mapa nungi anentsüogo.

Osang angazükba agi, 2015 küm nungi tenzüka Centre sorkar tetuyuba kübok Services department ya Delhi Lieutenant Governor kübok liasü.

2014 küm AAP-i Delhi assembly election nung takok ngua sorkar akümba sülen küm ka dang lirbo Centre sorkari Services Department ya LG kübok asütsü tetuyuba agüja liasü.

Brihostibarnü Supreme

Court-i, public order, police aser ali dak sendakba onüktem dak alaka services administration dak sendakba tashibo Delhi sorkar ket nung lir, ta obendang agüja liasü.

Centre aser Delhi sorkar na tsüingda tashi raktepba ken o nung Chief Justice, DY Chandrachud leniba nung constitution bench kati, administration tashiji nüburtemi shimtetba sorkar ket nung alitsü nüngdak, ta oshidang agütsü.

SC obendang sülen osangbenertem senden nung jembidang AAP tongti aser Delhi Chief Minister, Arvind Kejriwal-i, sorkar administrative nung temelenshi alitsü aser public works nung timtem agütsüba ketdangsertem nem temerenshi agütsütsü, ta

metetdaksü. SC-i obendang agütsüba sülen Kejriwal-i, iba ya democracy takok lir, ta ashi.

Kejriwal-isa, Supreme Court-i Delhi nüburtem nem ochi temeden agütsüba atema SC dang pelar; tang nungibo terenlok mapatem kanga kera inyaksü, ta metetdaksü.

SC obendang sülen AAP-i Hindi oshi agi twitter ajanga, "Kedangsertem transfer aser posting tashiji nüburtemi shimtetba sorkar ket nung alitsü. Nüburtemi shimtetba sorkar kübok dang ketdangsertem inyaksü," ta metetdaksü.

Delhi nüburtem asoshi inyakba mapatem nokdangtsü atema Lt Governor dak tashi malitsü, ta AAP-isa metetdaksü.

### BJD-i Third Front nung madentsü: Naveen Patnaik

**Bhubaneswar, May 11 (Agencies):** Brihostibarnü BJD lenir aser Odisha Chief Minister, Naveen Patnaik-i, BJD-i yimtenren party teloktep kecha nunga madentsü saka 2024 Lok Sabha aser state assembly elections nung party kijai tokteptsü, ta metetdaksü.

Bihar Chief Minister, Nitish Kumar aser West Bengal Chief Minister, Mamata Banerjee na densema regional lenirtemi sangküm Lok Sabha election atema opposition longjemtsü merangba mapang

nung Patnaik-i iba osang ya metetdaksüogo.

Delhi nung Ato kilonser, Narendra Modi ajuruba sülen osangbenertem den jembidang Naveen Patnaik-i, yimtenren teloktep tasen ka nung pai shilem magitsü, ta metetdaksü.

2024 küm elections nung BJD-i tangar den meloktepi tokteptsü asü?, ta asüngdangba langzüdang pai, "Ibaji teti agia onok tangatetba lir," ta ashi.

Odisha CM-isa, pai anogo pezünü Delhi semdangba

mapang nung yimtenren lenir shinga majurutsü, ta ashi. Pai Bodhbar nungi tenzüka anogo pezünü Delhi semdang.

Mongolbarnü Bihar CM, Kumar-i Bhubaneswar nung Naveen Patnaik'er ki semdanga liasü.

Brihostibarnü Naveen Patnaik-i, pai Ato kilonser Modi den Puri nung Sri Jagannath International Airport yanglutsü aliba atema jembi aser Ato kilonseri akokba tashi Centre-i yaritsü ta nangzükogo, ta metetdaksü.

### Exit Polls ajanga asadangtetbaji onoki magizüker: Basavraj Bommai

**Siggaon, May 11 (Agencies):** Karnataka assembly election exit polls ajanga single largest party ji Congress party asütsü saka party kati danga sorkar akümtsüsa menden peria mengutetsü (hung assembly), ta asadangtetba sülen Brihostibarnü BJP lenir aser Chief Minister, Basavraj Bommai-i, exit polls ji exit polls dang lir, BJP-i majority ngua sorkar akümtsü, ta ashi.

Exit polls balala ajanga Congress-i menden teimba nung takok angutsü, saka hung Assembly alitsü aser sorkar akümtsü atema HD Deve Gowda-ia aniba Janata Dal-Secular-i tongti shilem agitsü, ta asadangtetogo.

Assembly menden 224 aliba state nung sorkar akümtsü atema party kati menden 113 nungbosa takok angutsü nüngdak.

Osangbener den jembidang Bommai-i, "Exit polls ji exit polls dang lir aser exit polls teimbakati kanga atongtepa dang takok angutsü ta asadangtetogo. Ajsüaka ni asadangtetba agibo

onoki (BJP) majority ngua sorkar akümtsü. Atangiji May 13 nung ang metetsü, anungji osang sangdongba anogoji dang ata-a lidi," ta ashi.

"Exit polls ji kanga shidakbosa masür. Exit polls ajanga asadangtetba ajak nungji shilem 5 shi agibo teimba mesüra ishiba asür, anungji tatembang nungbo ibaji ajanga dang latetsü," ta pai ashi.

Hung assembly süra BJP-i JDS den lokteptsü asü?, ta asüngdangba langzüdang Bommai-i, "Hung assembly malitsü. Onoki majority ajanga takok angutsü," ta ashi.

Paisa, "Exit polls ji kanga aritepa dang renemer anungji aibelen aika alitsü. Sorkar akümtsüsa yarir (party) shinga malitsü. Ni asoshibo sorkar kümdaktsürtemji nüburtem lir, aser parnoki maneni BJP nem yimsü südaktsütsü," ta shisem.

Ano külen Congress lenir, Randeep Surjewala-i twitter ajanga, vote agütsütsü temsüa alir shilem aikati vote agütsüba ji Congress atema temaitsü tajung, ta metetdaksü.



May 11, 2023 nū at Pragati Maidan, New Delhi nung National Technology Day anogomong sentong nung Ato kilonser, Narendra Modi-i commemorative postage stamp sayatsüdang tangokba noksa nung angur.

### Nitish Kumar-i Shiv Sena (UBT) lenir Uddhav Thackeray ajuru

**Mumbai, May 11 (Agencies):** Brihostibarnü Bihar Chief Minister Nitish Kumar aser deputy chief minister, Tejashwi Yadav nati Mumbai nung Shiv Sena (UBT) lenir, Uddhav Thackeray par kidang ajurua senden ka menogo.

Iba senden nungji Bihar Chief Minister-i 2024 küm Lok Sabha election matongdang opposition party tem longjemtsü atema jembir asütsüa akok, ta bilemer.

Janata Dal (United) tongti lenir, Nitish Kumar aser Rashtriya Janata Dal lenir, Tejashwi Yadav nati nikongdang Nationalist Congress Party (NCP) tongti lenir, Sharad Pawar-a ajuruogo.

Mumbai nung Uddhav Thackeray ajuruba mapang Nitish Kumar-i, "Tang Centre nung alirtemi linük atema meinyaker. Linük nung yimtenren party ajak longjemer inyaksü nüngdak," ta ashi.

Sangküm Lok Sabha election nung BJP den tokteptsü atema opposition party tem longjemtsü nükjidong nung Bihar Chief Minister Kumar-i Opposition lenir aika ajurua arudar.

Bodhbarnüa Nitish Kumar-i Ranchi nung Jharkhand chief

minister, Hemant Soren ajurua liasü, iba sülen tenati osangbenertem senden ka ayongzüka jembi.

May 18 nū Kumar-i Delhi nung Opposition lenirtem senden ka ayongzüktsü tebilemba lir.

Yaküm Maharashtra nung yimtenren anokshia Uddhav Thackeray-i aniba sorkar chirepba sülen Shiv Sena nungja raktepba dak sendakba nung Brihostibarnü Supreme Court-i obendang agütsüba sülen pai, Chief Minister Eknath Shinde-i anentsüla, ta ashi.

Brihostibarnü Supreme Court-i, yaküm June 30 nū Maharashtra Angh, Bhagat Singh Koshyari-i assembly nung majority sayutsü atema Uddhav Thackeray jaokba tu tim masü, ta metetdaksü.

Ajsüaka Supreme Court-i, Uddhav-i aniba sorkar amenoktsü makok, kechiyong pai majority mesayui CM menden nungi anenadok, ta ashi.

SC-i obendang agütsüba sülen osangbenertem senden ka nung jembidang Uddhav Thackeray-i, "Eknath Shinde-i democracy tepsetba sülen takok angu. Anungji ni inyakba ama pai-a Chief Minister menden nungi anentsüla," ta ashi.



May 11, 2023 nū India Union Finance Minister, Nirmala Sitharaman Tokyo nung aliba Haneda Airport atongba sülen tangokba noksa nung angur. Lai anogo ananü Japan semdang.



# TIR YIMYIM

## YIMOBILEM (EDITORIAL)

DIMAPUR

ROGONÜ

MONUPII 12, 2023

### Prangbongtem ya koda ?

**Y**akanü Dimapur nung College azünger Nagatsür aiür ka Naga yimten nüchiso bushir telok ka nung kilonser (minister) kati kasetba mapa aser osangji asenok ajak asoshi tejashitsüka aser taoksatsüka lir. Iba lendong jagi Naga nung tang aser teti asoshi shisabolua bilemstsüba mapa aser tesem tongtibang ka sayur. Idakji tan ser asenoki tang yongi mera shitak ka magitetra, asenok atema tang dang nung jagi lendong tuluba ataloktsü ana nung dang lir. Aji oda, tang Nagaland nung alirtem asoshi tebilemstsü tulukaji Naga nung yimten nüchiso bushir telok ya shitakba nung kwiar mejangjatetsüsa telemsa adoka telok balala küma aoba ya dang masü saka parnok ket nung prangbong aliba ya asütsü. Akhidangbo, Naga nung yimten nüchiso bushirtem ket nung akaba prangbongtemji tsükchirtem den raradang amshitsü asoshi bendenbatem liasü, saka tanübo Naga nung yimten nüchiso bushiba jenjang nungi talangka asepzüka aluogo aser India den yimjung nung yimten ken o jembia tangatettep nung telemtetba ka dangi arutsü merangba mapang lir. Ashiko, Naga yimten tebilemstsü ken o ya yakta tembangtsüa akok mesüra metembangteti ano küm aika atsülanga aotsüa akok, ajisüaka asenok asoshi tebilemstsü tulukaji ken o tembangaka metembangaka, Naga yimten nüchiso bushir ket nung prangbong akaba tebilemstsü ya asütsü. Atangji, nungdakba purtem asoshibo government nungi temelaba meshir prangbong alia amshir, aji otsü balaka. Ajisüaka, tang yimten nüchiso bushirtem ket nung akaba prangbongtem yabo nisung kasettsü yangluba prangbong tesashitem lir. Item osettemjibo sepaitem amshitsü asoshi yangluba raraba osettem lir, anungji nisung ajak ket nung ayutsüla osetbo masü. Ajisüaka, tang amaisa kecha tazüokba aser tenokdangba mali, yimten nüchiso bushirtem ajak ket nung prangbong yura, ajibo tsükchir den raratsü renemer masü saka asenok o asenok na raratsü renemer amai asütsü. Aji oda, alima nung alir asünungji, kenü anogo tang Manipur nung atalokba amai Naga nungertem rongnunga rarateptsüsa atalok nungbo, Naga nungertembo tsükshir o tsükchir na tongpang tesashi nung rarar amai küma tesama aser takoksa tulu ajurutsü ana nung dang lir. Alima nung asenok ama tangar menepa tashitemetet tuluka mali aser shisatsüa maka ta asüba purtem asoshi lendong aketba oset anaji, ka sen aser kaji prangbong lir. Aji oda, tangarbo sen agi takar küma nübortem asoshi mapa aser rongsen züindaktsür saka asenokbo asen akaba sen agi asenoksasa asen taküm aser kibong dang masü saka asen lima aser nübortem tia raksatsür. Kasaji, tangarbo prangbong agi pei lima aser nübortem kümzüker saka asenokbo prangbong agi pei nübortem dang rakzükratemer aser pei teyi tenu aser tedongtechi dena kasettsü tenzükbaaji asenok asoshi tebilemstsü tasen tuluka kümogo. Atangji, bilemdangra tangbo akhi ama election mapang telongpurtemi prangbong amshia election nung candidate aser nübortem amokmerenba kangabo mangashir, saka akhidang mapang kabo Nagaland election nung telongpurtemi tetsübutsüka shilem agiba otsütem lir. Item otsütemji tanü asüng tanurtem dangbo ashitsüla masü nisung aika mulungjang nung mejungi rema alitsüa akok. Aji oda, asenok Nagaland majung tenzükbaaji yi, sen aser prangbong mashi-mashi amshiba nungi tenzükba lir. Taintemibo itemji ajangshio go aser item aibelen mapatem nungi taintem aikabo jenbua mali. Joko, taintem asoshi tanü aser asüng lanurtem atema tesünep Naga lima ka yanglutsütsü asoshi prangbong amshia rakzükratemba aser prangbong tashi agi akoktsü merangba sobalibattem mali küma nokdangtsü aser yimten nüchiso bushir ket nung akaba prangbongtem agi asenoksasa asenok lendongi maitsüsa yimten aser lokti telemtetba tajung kati yaktasa yakta arutsü merangtsübaji rongdak nungdak teinyaktsü mapa tuluka kümogo.

## OLEMSABANG

### Number tenet ya koda tongtibang temeshi lai nungi tetuyuba kar lemsateper

Mr. Y. Imti Tzüdir, Dimapur

Laishiba nung No.7 ya kanga tongtibang number ka ta angateter. (Ao o nungbo Number 7 ji züngdangba 7 ta asütsü, saka tatsüba agi No. 7 ta dang zülur). Laishiba nung number aika zülua aliba rongnung No. 7 jisa timba asütsü aser kanga tongtibang number ka asütsü südi. Anungji ni iba number atema Laishiba nung koda amshia lir ni kar shinür. Alima shisatsülen nungi reprangdangra tongnügen nunga sentsü (colour) tenet lir ta asenoki meteta lir. Alima nung tesümangtsü tobur tajung tesemtem aika aliba rongnung Tesümangtsü Tenet (Seven Wonders of the World), item tenetjisa tajungtiba ta alimai züngshir. Khristan ken (Church Music) Tonic solfa (note) nung ken ajak alphabet 7 nung dang atener. Itemji, d.r.m.f.s.l.t. Item notation 7 nungji dang kenji high süra sign (') aser low süra (,) sign amshir. Ibri (Hebrew) Laishiba nung Lipok tapu ka tekong ka ya ojang tenet (7 words) dang lir, aser item ojang tenet nung zülujang (letters) 28 lir (4x7). Ao Laishiba 2014 & 2015 adok nunga Lipok 1:1 ya ojang tenet dang lir, "Tetenzük nung Tsüngremi anung aser alima poktetdaktsü" Tsüngremi anung aser alima yangluba renemer külen 7 nü buba anisüngzüka among (Lipok 2:3). Tanüa asenoki Anitet 16:26 nung ashiba ama 7 nu buba nung Amungnü (Deobar) amunger. Ano number 7 ya Laishiba nung koma lir aika rongnung kar dang yamai agütsür:

1. Ijib nung küm 7 yimchiyimjung aser küm 7 ayawara liasü (Lipok 41:29-31)
2. Küm 7 shia Israel nungeri mayimtsü Tsüngremi öng agütsü. (Anitet 23:11)
3. 7 nü buba nung Putir 7 ti anir jangzü 7 apua Yiriko yimti 7 ben meket aser yimti la (Yihusua 6:15,16)
4. Solomoni ki shilem ajak aser noksa taginüba ajak yangludang küm 7 tashi agia liasü (I Chuba 6:38)
5. Yihova Tsüngremi ashiba ama Namani Yordan ayong nung 7 ben pungoka ai aser tenetben buba ir adokdang zütsüra aneper liasü (2 Chubatem 5:10,14)


#### Tasen lai nungia number 7 atema kar yamai agütsür:

1. Tenyartem mapang nung tamangertem anitsü asposhi nütsüngtemi nisung 7 shim (T. Mapa 6:5)
2. Arogo 7 indang (J. Adok tapu 2 & 3)
3. Jangzü 7 apuba (J. Adok. 8: 7-13; 9:1-3, 13; 11:15)
4. Tsüngrem tashi aser shisatsü 7 (J. Adok 7:12)
5. Temerenshi 7 akaba tenyar 7 (J.Adok 15:1)
6. Khrista nügutet (Title) 7 (J.Adok 5:12)
7. Terasaba marok 7 (J.Adok 16: 2-21)
8. Ano J.Adok kakat nungjisa item 7 shia lir: Petini 7, Tanela 7, Tenyar 7, Milen atalokdak 7, Tekolak 7, Tezü 7, Tenük 7 (Itemjibo tapu aser tekong magütsür)
9. Temaitsü ajenba 7 (J.Adok 5:1-17; 8:1-6)
10. Tepelatsü (Blessed) ojang ya Jungkai Adokba kakat nung 7 ben tashi shia lir. Itemji:
  - (i) 1:3 (ii) 14:13 (iii) 16:15 (iv) 19:9 (v) 20:6 (vi) 22:7 (vii) 22:14
11. Khrista Kangki nung angenloka alidang 7 ben tashi jembir pa asü:
  - (i) Lk 23:34 (ii) Lk. 23:43 (iii) Yh. 19:26 (iv) Mt. 27:46 (v) Yh. 19:28 (vi) Yh. 19:30 (vii) Ik. 23:46

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

# Jonathan Evans-i tsürabur aser tanurtem atema o entepba kaket saya



**May 11, 2023:** Taoba mapang NFL asayar aser Dallas Cowboys atema chaplain, Jonathan Evans-i cartoon series ka aser Yisu Khristai ashiba o entepba otsütem tanurtem dang sayutsü atema kaket ka adokogo. Evans aser pa kinungtsü, Kanika na den par tanur pongui

longjemer 'Stories from the Storyteller: Life Lessons from the Parables of Jesus' kaket adokba den külemi cartoon series saya.

Yisu ashiba o entepba otsü kaket ya tanurtem dang masü saka tsüraburtemia azüngtsü akok.

Osangbener den jembidang Evans-i, "Nü melung nung Tsüngrem O züngoka ayuba ajanga nai lenmang aibelena maotsü aser Tsüngremer tenangzükbatem metettsü," ta ashi.

"Ibayongji onoki cartoon series adok. Tanurtemi cartoon kanga sapua repranger, ajisüaka nükjidongjibo parnok nem Tsüngrem O angazükdaktsütsü atema lir. Iba kaket den külemi cartoon series ajanga tanurtemi Tsüngrem O meteta parnoki lenmang aibelena maotsü," ta paisa shisem.

Iba kaket nung tapu 12 shia nungji tatembanglen QR Code kaka lir, aser ibaji scan süra cartoon nungi clip ka sayutsü. Cartoon episodes ajakji YouTube nunga angutsü.

# ANOGO ABEN TSÜNGREM DEN

## Arogo tasü Ezekiel 37: 1-14

"Item teret taküm alitsü kokdi ma?" (Ezk. 37:3) Ainkar Ezekeil dang Tsüngremer nübur asüngzüka aoba mangdang ka sayu. Teret takong lenden ka sayu. Teret takong jagi parnok tia sayu. Parnok meyipa marutettsüba jenjang tashi orr liasü. Nüburtemi parnok sasa ayimten, "Onok teimla samaogo!" (t.11). Tsüngremi ainkar dang asüngdang, "Item terettem taküm alitsü kokdima?" Pai tasüngdangbaji Tsüngrem nem meyiptsü, "Kibuba, Nai dang metet!" Meimchir tsütsü nungi tiaji tamakoktsü liasü.

Tanü arogoji tajungba masü. Idakji noksa lir saka ain mali. "Parnoki yimsü keta asenba mapa inyaksü, saka temeshiba kümdaktsüba ain parnoki magizüker" (2 Timo 3:5). Idakji tenüng ka lir saka taküm mali. Khrista Sardi nung aliba arogo arutsü. "Tenüng agi na taküm, saka na tasü lir" (J. Adok 3:1). Rongsen kar saka mangdang mali (J. Adok 3:17).

Idakji mapa (sentongtem) lir saka temeim mali (J. Adok 2:2-4). Renloktsü melen idakji telemsa dang tali adoker. Sayutsüngir jagi ashir, "Aser ano ni anüng kübok O bendangdakji angu, idakjia tamajung liasü, aser temeshi alidakji temenen liasü" (Sayu 3:16). Vance Havneri tutettsür, "Asenok jangratemtsü ki kar, amentsü jangratemtsü car kar, jangratemtsü sermon angatsü jangratemtsü arogo kar. Khristai arütsüba indang asenoki kechi metet?"

Noksa yanglur ka dang telok ajunga mesatsüsa aser asentenshi nüngdak ta angatetdaktsütsü teimla nung, süya aliba arogo ka noksa yanglutsü asüngdang. Noksa nungji akhüm taket tenla ki talang ka, jangratemtsü teperang sabang, aina agi tongpanger, sung kishi tulu aser tesangwa tulu tsükloka yanglur kishi tulu anasaji tenla enoktsüdak süngden tila ka tebang nungji sorak zü agi yangpanger yanglu. Au, arogo kobai missionary meyoker mesüra meyarir aji tasü arogo lir. Dr. Oswal J. Smithi (1889-1986) ashir, "Arogo kati sayutsüngi mesüra meranga akümstsü."

Saka Tsüngremi arogoji mesendok. Tasü süngkümi ibaji makoktsü (Mt. 16:18). Asenok shilem Ezekeili ama tashi angatsüba aser shintsüba (Ezek. 37)". Tashi agi, matitaki ayimtenang, Jangzü ama ne ola adokang, aser kü nübur dang parnok ozüng raksaba indang aser Yakob kidong dang parnok temenen indang metetdakjang" (Isa. 58:1). Idangji arogoi kong alitsüla item jagi meyipa arutsü. Ibai army tulu ama noktaksü, aser Khrista asoshi alimaji akoktsü (Ezk. 37:10). Alima tamajungtiba nung tajungtiba arogo nüngdaker.

# Pakistan nung tensa raksaba ajanga Khristantem timtemer

**May 11, 2023:** Pakistan nung taoba mapang Ato kilonser, Imran Khan apuba sülen linük nung tensa kanga mejungi akümba dang masü saka Khristantem-a kanga timtemdar.

May 9, 2023 nü linük yimtiba, Islamabad nung aliba High Court kima paramilitary rangers-i Pakistan Tehreek-e-Insaf (PTI) party lenir, Imran Khan apuba sülen pa pusemertemi longkak aitdang linük tesem balala nung nisung 10 shi süogo.

Linük nung tensa raksaba ajanga missionary Pastor Irfan James-a mission tour aotsü aliba thinen aser Afghanistan den arrtsülen Khyber Pakhtunkhwa kübok Hangu nung aliba Khristan kibong ka kidang jenoka lir.

Arrshi küm 34 pastor motorcycle ka ajanga Hangu-i ao aser par kidangi meyipa arutsü atema tensa süngjem atadar.

PTI party pusemertemi kilometer 1.85 talang Pak-Japan Friendship Tunnel mokdangogo.

Osangbener den jembidang James-i, "Public transport mangur. Shiranger kibongtem shisabulur, kechiyong hospital temji Peshawar yimti anasa dang lir. Ozü kibong-a ni atema shisabulutsür. Punjab province nung Tenla kitem shibangogo," ta metetdaktsü.

"Longkak aitertemi süng amer sepaitem den rarar," ta

pa ashü. Missionary-i, sorkari jelia security renem nungbo jungla; iba tensa azüoktsü atema judiciary-i tiyongtsü aita inyaksü imlar, ta ashi.

Linük nung Tenla kitem dang masü Arogoi ketdangsüba school tema aika shibangogo.

Catholic Board of Education chief executive, Asher Javed-i, Lahore, Faisalabad aser Rawalpindi nung Arogoi lapokba school ajak May 11 nü shibangogo aser hopta ka shi shibangtsüa akok, ta metetdaktsü.

"Yimtenren tsütsü tensa raksaba ajanga shinga tajangzüük mangutsü. Pepei tesem nung tensa apir school lapoktsü atema principal-i telemtetba agitsü," ta pai metetdaktsü.

Lahore nung Arogoi lapokba rejutem, social communications commission aser Arogo indang WAVE studio-a shibangogo.

Ano tanga osang ka nung, taoba mapang foreign minister aser Imran Khan den külemi atongsema inyaker, Shah Mehmood Qureshi-a May 11 nü police-i puogo.

# Uttar Pradesh nung pastor ka den Khristan 4 bail nung chiokogo

**May 11, 2023:** Uttar Pradesh nung anti conversion ozüng kübok tai tonglokja alir pastor ka den Khristan pezü bail nung chiokogo.

May 10 nü osangbener den jembidang pastor Dinesh Kumar-i, "Atangji onok nem bail agütsüogo, saka court-i telatetba kar agütsü," ta metetdaktsü.

May 9 nü Jaunpur district court-i pastor den Khritan pezü shia dang surety bond sen 100,000 meshi aser iba ken o nung shinga amokmeren masütsüla, ta tuyu.

Anti conversion ozüng alema parnoki tangartem Khristan yimsü dangi meyipdaktsü, ta tai tonglokja taküm February ita nung parnok anema

ken o benoka liasü.

"Joko onok aputsü menüngdak, iba atema ni Tsüngrem dang pelar," ta pai ashü.

Taküm February 12 nü parnok tekülem sentong tagidak mapang nung police-i parnok pua liasü aser parnok anema anti-conversion ozüng kübok ken o benok.

Court-isa parnok dang Prohibition of Unlawful Conversion of Religion Act kübok bushisüngdangba maparen nung amaliteptsü tuyu.

2021 küm Uttar Pradesh nung Chief Minister Yogi Adityanath-i aniba sorkari anti-conversion ozüng tasenba ya benoka liasü.

February ita nung

Pastor Kumar leniba nung police-i maneni anti-par kidang tekülem sentong agia lia police den right-wing Hindu züngsemtem par kidangi

arua tetsür asem densema nisung 16 pua liasü.

Pastor-i, "Ni parnok dang, onok sarasadem sentong agir dang, aser iba ya ozüng alema inyakba masü ta ashi, ajisüaka parnoki kü dang o tamajung ashiba den külemi ozü ki rongdoktsütsü ta amokmerena liasü," ta metetdaktsü.

Parnokisa kidang nungi Laishibatem den music system bener ao, ta pai metetdaktsü.

February 12 nü pa apuba sülen anogo pezü dang lirbo chiok saka

conversion ozüng kübok pa densema Khristan pongu anema ken o benoka liasü.

Uttar Pradesh nung anti conversion ozüng kübok pastor tem densema Khristan aika pua jail balala nung puoka lir.

Tang Uttar Pradesh kübok district 75 nungi pastor 34 shi jail 11 nung puoka lir, ta Khristan lenirtemi metetdaktsü.

Nütsüng million 200 aliba state nung Khristan nütsüngbo shilem 0.18 dang lir.

United Christian Forum-i ashiba agi, 2022 küm Khristantem anema inyakba tatalokba teimtiba aliba state ji Uttar Pradesh liasü.

**AO OSHI ANGAZÜKDAK:  
TANÜ ANGAZÜKTSÜBA OJANG**



Tir Yimyim

**Pupet**

(v) aibelena apu, mepushi jendaktsü ( miscaught)  
\* Sakubai auer pupet, anungji yimteni pa dang sen achi.

**Pur**

(n) medemsor (contemporary friends)  
\* Tanü onok pur aikati mapa tajung inyaker.

**OLONG PAITEP # 6512**

15x15 crossword grid with numbers 1-22 indicating starting positions for words.

**TIPILEN**

- 5. Songjen - (4)
- 6. Tebur nungja - (6)
- 8. Tatutsü - (4)
- 10. Nü den tantsü - (3)
- 11. Molamoshia - (6)
- 13. Aonsotsü tako ka - (5)
- 15. Mechinüi aküm - (6)
- 17. Me \_ \_ \_ tep - (3)
- 19. Memeshi - (4)
- 21. Shitak dang - (6)
- 22. Kongru mapang - (4)

**LANGTSÜNGLEN**

- 1. Apitet - (5)
- 2. Tezüng atema mesüba shiruru - (3)
- 3. Süng takong - (4)
- 4. Tema tereprangtsu - (4)
- 7. Onsara - (4)
- 8. Taso - (4)
- 9. Yimyayimpong - (5)
- 12. Ak alidak - (4)
- 14. Yangi masü - (4)
- 16. Temela masü - (5)
- 18. Ayak aketba shiruru - (4)
- 19. Ali agi yangluba chipo - (4)
- 20. Nisung telemsa - (3)

**OLONG PAITEP # 6511 TELANGZÜBA**

**TIPILEN :**

- 1. Tanga, 6. Wara, 7. Rajang, 9. Anük, 10. Jenjang, 11. Alar, 14. Ngashi, 15. Nüla, 16. Mechi.

**LANGTSÜNGLEN :**


- 2. Anga, 3. Yabang, 4. Tarok, 5. Orak, 8. Ainer, 9. Anema, 10. Jabili, 11. Akong, 12. Miim, 13. Anem.

**NAI-A YA METETTER MA**



Asen temang nung tashi taittibaji temeli lir.

**Noksa nung meputepi aliba 10 bushiang**



Guwahati: Assam chief minister Himanta Biswa Sarma-i Bodhbarnü healthcare scheme; 'Ayushman Asom - Mukhya Mantri Jan Arogya Yojana' amenoktsüba mapang tangokba noksa nung angur. Iba scheme ajanga kibongshia nem küm nung sen lakh 5 tashi cashless medical treatment agütsütsü. May 10 nü Sarma-i aniba sorkar küm ana jungogo. Ketdangsür sangdong ka ajanga ashiba agi iba scheme yagi mezüng kibong lakh 26 ayimjemtsü.

**Manipur: Churachandpur nung maneni mepetmesü adok**

**Imphal, Monupii/May 11**

**(Agencies):** Mongolbar anepdang Manipur kübok Churachandpur district anasa maneni mepetmesü adokba osang metetdaksüogo.

Mangatettep ya Churachandpur district kübok Kangvai anasa Molngat yimtsüng nung adoka liasü, ta kasa sangdong ajanga metetdaksü.

Osang ajanga ashiba agi, ozüng raksartemi injang khaloktsüba sülen kin ana tsüngda mangatettep adoka liasü.

Manipur kübok Churachandpur district nung

asendenshir mangatettep adokba ya Brehostibar anepdang 8 ako shi nung ataloka liasü.

Iba tesem temeket nung mangatettep adokba osang agütsüogo aser ozüng raksartemi ki kar nung mi senokja rongdaksü.

Kasa mapang nung lendong atalokba tesemi security forces yokogo aser tensa aziöker lir, ta osang ajangasa metetdaksü.

Temetettsü kaji Manipur nung taoba hopta mepetmesü tulu adoka liasü. Indigenous lokti aser talisa Kuki nungertemi

state nung Meitei nungertemi tribal jenjang meshiba anema

longkak aitba mapang mepetmesü adoka liasü.

Iba lendong atalokba sülen nisung 60 süogo aser nisung 30,000 dak tema talidak ki maka kümogo.

Indian Army aser Assam Rifles column 128 mesüra sepai 10000 dak temai tang tashi Manipur kübok mepetmesü adoker aliba tesemtem nung flag march ayongzüka agia arudar.

"Indian Army den Assam Rifles-i Manipur nung security aziöka lir aser mepetmesü adoktsü alibattem nokdangogo," ta defence sangdong ka ajanga metetdaksü.

**Meghalaya: Kaketshirtem MGU VC campus telung nung shibanga toktsü**

**Shillong, Monupii/May 11**

**(Agencies):** Brehostibarnü kaketshirtem, tesayurtem aser North Khasi Hills District Unit nungi Khasi Students' Union-Education Cell züngsemtemi Meghalaya nung Mahatma Gandhi University (MGU) Vice-Chancellor campus telung nung shibanga toktsü.

University nung faculty agi anüngba densema ken o balala dak sendakba nung university ketdangsür anema longkak aita liasü.

Kaketshirtemi ashiba agi, department shia nung tesayur ka

ana dang lir aser library ya takdang tazüng ka kong kaket kecha mali.

Iba den bendenloksema longkak aitertemi ashiba agi, kuli tejangja magütsüi kaketshirtem dang senchi achir aser ketdangsürtem anema ola adokba tesayurtem mapang nungi aginer.

Longkak aita aliba kaktshirtemi university indang kishi tongtiba shibanga toktsüba ajanga vice-chancellor campus toktsür motetti akümba sülen tensa mejungi aküm.

Osang ajanga ashiba agi, vice

chancellor-i longkak aitertem den ajuruteptsü atema pa indang takdang nungi adoktsü memulung aser pa pa indang takdang nung shibanger liasü.

University nung faculty züngsem agi anüngba ya tang tasen masü aser mapang talangka nungi ashishia aruba ken o ka lir.

Kaketshirtemi resources peria maliba ajanga education jenjang majungba indang ashishia aruogo aser iba den faculty ishika dang asüba ajanga parnok nem khuret tali agütsüba ajanga timtem adoker.

**Polygamy nokdangba ya kin ka dak rangloker inyakba masü: Sarma**

**Guwahati, Monupii/May 11**

**(Agencies):** Assam nung kinungtsü ka dak tali agiba (polygamy) nokdangtsü atema benoka aliba ya lokti ka dak rangloker agiba jenjang ka masü.

Iba olen ya Assam chief minister Himanta Biswa Sarma-i Brehostibarnü lemsatapa liasü.

All India United Democratic Front (AIUDF) tekolakba Badaruddin Ajmal-i iba jenjang agiba atitsüba dak sendakba nung Assam chief minister-i iba telangzüba agüja liasü.

Ajmal-i, Assam CM Himanta Biswa Sarma-i Muslim nunger dak rangloker inyakba aser parnok tamangba yimsü inyakyim balala nung minprongba atema CM aitsüogo.

Assam CM Himanta Biswa

Sarma-i, Assam nung polygamy inyakyim ya 2024 masü dang nokdangtsü, ta ashi.

Paisa, "state nung polygamy inyakyim nokdangtsü atema ken o junga bushisüngdangtsü atema committee ka tentettsü aser iba atema inyaksangshi tenzüko," ta ashi.

Taoba mapang Assam chief minister Himanta Biswa Sarma-i, "onoki (Assam sorkar) state nung polygamy inyakyim tembangdaksüner," ta ashi.

"Nisung ka Hindu-a süang mesüra Muslim-a süang, shingai kinungtsü aika magitettsü," ta Assam chief minister Himanta Biswa Sarma-i ashi.

"Assam sorkari Muslim Personal Law (Shariat) Application Act, 1937 kübok provision tem den Constitution

of India Article 25 asadangtsü atema committee ka tentettsütsü asoshi telemtetba agiogo," ta pai ashi.

Maneni CM-i ashiba agi, Assam sorkari act ka ajanga polygamy ya ozüng alema ta sangdongtsü asoshi setong lir, "iba atema committee ka tentettsü aser parnoki legal luminaries, Islamic scholars aser tanga shisakartem den ken o ashishitepba sülen Assam sorkar nem parnok tebilemba osang agütsütsü," ta ashi.

Iba committee yagi, Assam nung polygamy nokdangtsü atema state legislature ket nung tashi ali mali aji asadangtsü.

Committee-isa, osang tejangja bendener telemtetba ka agitsü atema legal expert tem densema stakeholder ajak den sensak asemtsü, ta CM-i ashi.

# Pakistan SC-i NAB dang Khan ghonda ka tsungda okadaki anir arutsu tuyu



May 11, 2023 : Peshawar, Pakistan nung taoba Ato Kilonser Imran Khan pusemertem aser police na Bodhbarnü mangatettep adokba sülen Radio Pakistan building ronger aliba meketa nüburttem adenshir aliba noksa nung angur. Pakistan nunger keddangsurtemi Brehostibarnü Khan pusemertem aika puogo aser tensa azüoktsü atema linük kübok tesem balalai army yokogo.

**Islamabad, Monupii/May 11 (Agencies):** Taoba Ato Kilonser Imran Khan linük indang anti-corruption agency-i apuba sülen anogo ishika lir Pakistan Supreme Court-i, pa ghonda ka tsungda okadaki anir arutsu tetuyuba agütsü.

National Accountability Bureau (NAB)-i Khan Mongolbarnü apuba sülen pa indang legal team-i pa apuba anema ken o benokba sülen SC-i Brehostibarnü iba tetuyuba agüja liasü.

Pa apuba sülen linük ajunga nung mepetmesü tulu adok tenzük aser ibayongji tensa azüoktsü atema sorkari Army ajatsüsa aküm.

Imran Khan okatsüri ashiba agi, pa apuba ya ozüing alema lir. Keddangsurtemi Brehostibarnü Khan indang Pakistan Tehreek-e-Insaf (PTI) party nung lenir tejen asem puogo, kong pa indang cabinet nung taoba foreign minister densema lir.

Khan pusemertem aser police na tsungda yimti balala nung mangatettep adokba sülen tang tashi nung nisung 2,500 puogo aser nisung 11 asüba den nisung aika yiruogo.

PTI pusemertem military establishment tem makogo aser tanga ki aser osettem rongtoktsüba sülen sorkari tensa azüoktsü atema army teyari meshia liasü.

Mongolbarnüa tensa mejungi liasü aser paramilitary force aser police temi yimti tulutem nung yimtungtem meita ataba nguogo.

Islamabad police keddangsur kati lemsatepba video ka nung prangbong bener military garitem lendi nung anenden aliba aser sepaitem prangbong bener aliba sayuogo.

Mobile data service maneni shibanga lir aser Pakistan kübok province pezü nungi ana nungbo school aser office tem maneni shibanga lir. Twitter, YouTube, Facebook aser Instagram amala

Social media platform tem ajak shibangtsür lir.

Arishi küm 70 tain Khan apuba ajanga Pakistan nung tang mepetmesü tulu adoker lir, kong rongsenketzüng agi kanga timtemba mapang ka lir.

Khan ya tang NAB ket nung anogo ti atema yua lir. Pa ano Bodhbarnü ken o tanga ka nung aitsüogo. Pa PM asüba mapang state nem agütsüba sempet ozüing alema ayokba atema aitsüogo.

2022 küm April ita PM mapa nungi aginba sülen sorkari khan anema police ken o 100 dak tema benokogo.

Kasa mapang nung rights teloktemi longkak aitertem azüokba mapang azüzüka inyaksangshitsü aser internet tanaben lapoktsütsü asoshi mepeshia metetdaksüogo.

Pakistan tir Arif Alvi, shiba PTI lenir tejen ka lir, pai ashiba agi linük nung tensa kanga mejungi akümba ngua pa kanga aoksar aser minpronger.

# Guinea nung police-i longkak aiter 7 khaset

**Conakry, Monupii/May 11 (Agencies):** Linük yimtiba Conakry aser tanga yimtittem nung longkak aiter nisung tenet tepsetba aser nisung 32 yirutsüogo ta leniri ashiba sülen sorkari anema nokdakertem longkak aita sentong tasen ka ayongzüka agitsü sentong yangludat.

Bodhbarnü riot gear semer Police-i longkak aitertem tashiyim amshia azüoka liasü, shirnoki meyiper police tem dak long agi aon aser tyre tem rongra liasü. Bodhbarnü longkak aita ya military sorkar anema nüburttemi longkak aita aruba rongnung

ka lir. Guinea nung military-i 2021 küm sorkar atsünga liasü.

Kasa mapang nung southeast nung Nzerekore yimti nung aser central Guinea nung Dabola jila nunga nüburttemi longkak aita liasü.

Opposition party tem aser lokti tentet balalai külem sangdong ka ajanga ashiba agi, longkak aitertem nisung tenet khasetogo aser nisung 32 injang agi yiruja liasü.

Parnoki ashiba agi nisung 56 apuba osang jangjaogo aser maneni yimjung nung longkak aittsü sentong lir.

Nisung asüba indang

osang ya military yimsüsürtemi tang tashi jangjashija mali.

Army-i srokar atsünga sülen Guinea nung nüburttemi aiben longkak aita arudar aser mapang kar nungbo security forces-i tashiyim amshiba ajanga mepetmesü tulu adoka arudar.

2020 küm nungi tenzuka West Africa nung linük aika nung military sorkar amenoka arudar aser tang election agitsü ta tenangzüka agütsür maneni mapang atsülanga yimsü süyonga odar.

Guinea nung keddangsurtemi democracy dangi meyiptsü atema küm asem benoker aliba küm ana inyaksangshitsü asoshi October ita benoka liasü. Iba inyakyim ya regional political aser economic bloc; Economic Community of West African States-i magizüki liasü.

# Ukraine-i Bakhmut nung meyiper amaker

**Kyiv, Monupii/May 11 (Agencies):** Rara tenzük hopta 63 buba nung Ukraine-i ashiba agi par sepaitemi Bakhmut yimti northwest tsütsü Russian sepaitemi mükabanger aliba sapoker yiogo. Moscow-i iba yimti ya sapanngtsü meranga ita toku tashi rara arur.

Geolocated footage nung Ukraine sepaitemi Bakhmut southwest aser west tsütsü Khromove aser Bila Hora anasa meyiper amakba sayuogo, koba Russian sepaitemi iba yimti lungbangtsü meranga amshia aru.

Ukraine nunger temi ashiba agi par sepaitem ya metong kilometre 2.6 aser lenden kilometre asem tejakleni oa 72nd Separate Motor Rifle Brigade indang trok buba aser ti buba company tem samatsü.

Sen yong raraba Wagner Group nem sen agütsür Yevgeny Prigozhin, shiba lenisüba kübok iba yimti ya amaker, paia Russian sepaitem meyiper aoba jangjatsür mesüka ashi. May 9 nü pai ashiba agi, tamachi tanishir mechi Bakhmut anasa Russian unit kati parnok amenoka aliba tesem ka yutsür ao.

"Front line chireptsüsa tanü ajak inyakogo. Tanü defence ministry indang unit ka parnok aliba tesem yutsür jena ogo. Nisung ajak ajet," ta Prigozhin-i shia liasü.

Ibai Russian sepaitem asoshi tetsükdaksü ka alitsü, shirnok May 5 nü Khromove tsütsü arua liasü. Anogo ana lir parnok ano Bakhmut north tsütsü kilometre 15 shi pilar tesem ka agia liasü.

Russian sepaitemi iba yimti nung terben dak tali amak aser Moscow-i ashiba agi, city blocks ishika parnoki agiogo. Ukraine asoshi rarar temi anüdoklen tesem tapu ka amokbang.

Anatsülen asoshi Bakhmut nung azü timba tokshia lir. Ita toku tashi rara arudang Russia nunger nisung 100,000 shi süogo, aser Ukraine indang eastern forces odongtar Serhiy Cherevaty-ia par sepai asüba tesadang ka iba tesem nung lir, ta ashi.

Russia indang mitkar lenirtemi iba yimti rakzüksü asoshi temolungtetba aliba nung atsü-anem akar amai ajiteter, aser ano Ukraine nunger temi meyiper mile 497 talang frontline nung amaksü imla aliba atema shisabulur.

Prigozhin-i par sepaitem anizükur aotsü amokmeren aser Russian defence ministry ajanga par sepai nem injang tulu peria magütsüba ajanga par telok asür ta tenüng asen.

Prigozhin-i May 5 nü Russia indang defence

lenirtem dangi osang ka yokba nung par nisungtem Bakhmut nungi anizükur aotsü ta shia liasü.

"May 10, 2023 nü Bakhmut nung ozü sepaitem aliba tesemtem defence ministry indang unit nem agütsütsü aser tanünga Wagner tem pei zübu menaktsü asoshi logistic camp temi meyipa aotsü. Bakhmut nungi ni Wagner unit tem anizükur aor, kechiaser injang malibo parnok asütsüba dang," ta Prigozhin-i ashi.

Russia defence chief Sergei Shoigu-i osettsüset aser hadir keddangsur Colonel-General A Kuzmenkov dang special military operation nung aliba sepaitem nem maneni nüngdakba nok-nü aser hadir agütsütsü shia liasü.

Ukraine indang Military Media Center ajanga ashiba agi, Ukraine nunger temi meyiper amaksü teimla nung Russian sepaitemi hadir bendener.

"Tsükchirtemi imla aliba ama meyiper amaker meyipa yoktsü asoshi renemshir. Tashiyim amshirtemi tanen makai Russian Federation nungi hadir belener," ta ashi.

May 6 nü Chechen forces lenir Ramzan Kadyrov-i Russian defence ministry dang Bakhmut nung Wagner sepaitem aliba tesemtem nung melena nokdaksü asoshi par sepaitem duty yokang, ta asüngdanga liasü.

Kasa anogo Prigozhin-i Shoigu dang May 10 ayatirm tashinung par sepaitem melentsü tezüluba nung agüjang ta shia liasü. Saka tasüngji injang tali agütsütsü nangzükogo, ta pai ashi.

Injang den külemi Prigozhin-i Bakhmut nungi ainshira tetsü tasoli asoshi ashikülak mapa inyak ta pa dak tai tongloktsütsü amokmeren keter liasü.

Ukraine eastern forces odongtar Cherevaty-i ashiba agi, Prigozhin ya pai tamakok ajuruba miimbangtsü meranger.

"Bakhmut rakzüksü asoshi pai tali nangzüka ayu saka nangzükba ama meinyaktet nung injang agi anünga otsü jembir, nübu akoksaba dang masü pai akokba kecha mali," ta Cherevaty-i ashi.

Wagner ya linük balala nungi tetsükdaksü ajurur aser kiralongrar telok ka ta züngshir. France parliament-i May 10 nü iba telok ya kiralongraba lokti tentet ka ta tenüng jaloktsü aser European Union dang kasaji inyakttsü ashi. European Parliament-ia inyakogo aser kasaji United States-ia inyakogo. United Kingdom nunga iba mera agitsü sentong yanglur.

**SANGDONGER**  
Govt. Poultry Farm Mokochung nung Layer  
An chanu Golden, Hisar. 15/5/2023 -20/5/2023  
tashi ayoktsü. An ka jenjang Rs. 110/-.  
Mapang 9:00 AM to 1:00 PM.  
Sd/-  
Manager



Jantar Mantar, New Delhi nung Wrestling Federation of India (WFI) tekolakba Brij Bhushan Sharan Singh anema longkaka aiba mapang wrestler temi sü tanak mesür longkak aitba noksa nung angur.

### ICC ODI rankings: Pakistan-i India ajateta World No.2 kümogo

**Monupii/May 11, 2023 (Agencies):** Brehostibarnü sayaba ICC ODI rankings nung Pakistan World No.2 team kümogo. Kidang New Zealand 4-1 agi akokba sülen tang parnok iiba jenjang ajangzükfetogo. Parnoki tang point 116 nguteta lir aser India dang nungi point ka agi timba lir.

Ita ishika tejakdang Rohit Sharma-i aniba team kidang World Champions Australia 1-2 agi makokba sülen tang parnok tasembuba jenjang nung lir aser kasa mapang nung Pat Cummins-i aniba Australia team-i rating point 118 nguteta parnok temaba jenjang nung lir.

Pakistan ya tawa ICC ODI rankings nung World No.1

ODI team aküm ajisüaka parnok temaba jenjang nung ghonda 48 dang liasü. Parnoki New Zealand team 5-0 agi mekoktetba ajanga temaba jenjang aitsütsüsa aküm.

Annual rankings nung 2020 küm May ita nungi asayamung ajak züngoker. 2022 küm May ita tashi nung tembangba asayamungtem ajak shilem 50 züngshir aser tanungba asayamung tem shilem100 züngshir.

Kasa mapang nung taruba ita Oval London nung Australia den World Test Championship (WTC) final asayatsü lia India team ICC Test rankings nung temaba jenjang nung lir. Parnoki rating points 121 nguteta lir aser parnok Australia dang nungi point

pongu agi timba lir. England, South Africa, aser New Zealand team top five nung lir. England aser Australia na makokba den New Zealand den asayamung draw nung tembangba sülen Pakistan team tang trokbuba nung lir.

Maneni ICC T20I rankings nunga India team temaba jenjang nung lir. Parnoki taküm küm tetenzüklen Sri Lanka aser New Zealand na koka liasü. India team-i tang rating points 267 nguteta lir aser parnok tanabuba jenjang nung aliba England team dang nungi point ti agi timba lir.

ICC T20I rankings nung New Zealand, Pakistan, aser South Africa team top five nung lir.

### State nung shisaliok asendenshitsu... (Tapak 1 nungi...)

Nagaland nung NAS 2017 ya SCERT ajanga inyak aser iba survey yagi tanur temi angazükba tsütsü terenlok aliba angatetba nung teyari angu aser tanurtem angazükba jenjang renloktsü asoshi shisa agütsü, ta lai ashi.

Central Board of Secondary Education (CBSE) ajanga November 12, 2021 nung NAS 2021 ya State Government Schools, Government Aided Schools, Private Unaided Recognised Schools aser Central Government Schools nung Grade 3, 5, 8 & 10 nung azünger atema Assessment administrator ama agia liasü.

State level NAS 2021 ya Directorate of School Education ajanga agi, ta lai ashi.

NAS 2021 nung tongtipang tebushitetba kar - class 3 atema kaketshirtem indang National Average percentage ya shilem 59 liasü aser class 5 nung shilem ter ajema shilem 49 dang akum. Ibai ano class 8 nung tali ajema shilem 41.9 akum aser class 10 nung shilem 37.8 liasü, ta lai

ashi.

Yangji performance tsütsü subject ajak nung amai tajemba akum aser linük sasep nung class 3 nung mathematics score shilem 57 liasü, aser class 5 atongdang shilem ter jungnüa ajema shilem 44 akum, class 8 nung shilem 36 akum aser class 10 atongdang shilem 32 dang akum, ta lai ashi.

Linük sasep nung language score ya class 3 nung shilem 62 liasü, class 5 nung shilem 52 akum, class 8 nung shilem 53 akum aser science atema national score ya class 8 nung shilem 39 aliba class 10 nung shilem 35 akum, ta lai ashi.

Gender-wise performance tsütsü reprangdangra, linük aser state level nung class shia subject ajak nung tebur dang nungi tetsürtem tajungba lir, ta ashi.

Grade 3 tembangba sülen tanur ajak 2026-2027 tashinung foundational skills ngutettsü mechi Ministry of Education ajanga National Initiative for Proficiency in Reading with

Understanding and Numeracy (NIPUN) Bharat ya July 2021 nung national mission la ama tenzük, ta Kerhuo-i ashi.

Foundational Literacy and Numeracy (FLN) atema tashi taitba kumdaktsütsü merangba nung tongtipang mera ka ama NCERT ajanga March 2022 nung large-scale FLS agia liasü.

Education System nung NAS aser FLS ya kanga tongtipang ta angateta, iba sentong takok ngua inyaktsü merangtsüla, ta lai ashi.

Tanurtem anagzükba tsütsü iba sentong ya kanga tongtipang asütsü, ta Kerhuo-isa ashi.

Iba workshop tenzükba sentong nung menden Deputy Mission Director, Samagra Shiksha Nagaland, Kelhikha Kenye liasüü aser iba sülen FLS 2022 aser NAS 2021 ajanga bushitetba aser yangji ajemdaker sentong balala yangluba indang workshop agia liasü, kong shisalen sayur Senior Lecturer SCERT Veketulu Veyie aser Researcher SCERT Lanukala I. Jamir liasü.

### Madrid Open ayongertemi tatok meshi

**Monupii/May 11, 2023 (Agencies):** Tetsür tarep asaya finalists tem nem taoba hopta asayamung nung asaya tembangba sülen o jembitsü asoshi maongka magütsüba atema Brehostibarnü Madrid Open ayongertemi tatok meshiogo.

Tebur tarep asaya finalists tembo asaya tembangba sülen lokti den o jembitsü asoshi maongka agüja liasü.

Deobarnü tetsür tarep asaya final nung Victoria Azarenka aser Beatriz Haddad Maia nati Jessica Pegula aser Coco Gauff na akok, ajisüaka asaya tembangba sülen sentepa aliba lokti den jembitsü atema parnok nem microphone magütsü.

"Onoki asayartem aser fan tem dang tatok meshir, shirnoki Mutua Madrid Open tournament nungi iba dak tali imlar," ta Madrid Open CEO Gerard Tsobanian-i Twitter ajanga ashi.

"Tetsür tarep asaya finalists tem nem asaya tembangba sülen fan tem den jembitsü asoshi maongka magütsüba ya

agizüksü makoktsü aser onoki Victoria, Beatriz, Coco aser Jessica nunger dang tatok meshir," ta paisa ashi.

Tsobanian-i ashiba agi, tarutsü nung parnok inyakim tajungba küma yanglushitsü atema WTA den inyaktepdar.

"Onoki aibelenogo aser iba ya tarutsü nung kodanga mataloktsü," ta pai ashi.

American tsür Pegula-i Mongolbarnü Rome nung osangbenertem den sensaksema mapang iba asayamung ayongertem aija liasü.

"Onoki mejembitetsü ta bilem asü? masü. Ni kü taküm nung iba ya kodanga mangashidang," ta lai ashi.

"Iba telemtetba agiba mapang nisungtem koba putu nung lia liasüar ni memetet," ta laisa ashi.

Tetsür kija asaya akokla Iga Swiatek-ia Honibarnü asaya akokba sülen o jembiba mapang asayamung aitsüogo, aser ashiba agi anepdang l ako nung asayatsü ya kecha jangrademtsü mali.

### ISSF World Cup: Rhythm Divya & Sarabjot nungeri medal angu

**Monupii/May 11, 2023 (Agencies):** Baku, Azerbaijan nung ISSF World Cup Rifle/Pistol nung Rhythm Sangwan-i kanga junga asaya tetsür 10m air pistol final nung bronze medal ka nguogo.

Rhythm ya Greece tsür Anna Korakaki (gold) aser Ukraine tsür Olena Kostevych (silver) na sülen tasembuba jenjang nung tembanga liasü. Tenaprongla yagi Olympics nung gold medal ngur liasü.

Sarabjot Singh aser Esha Singh naprongla tebur aser tetsür 10m air pistol event nung final atema qualify süaka medal mongutetba sülen Rhythm-i iba medal anguba ajanga India nunger mulung peladaktsüogo.

Qualification stage nung Rhythm-i point 581 aser Esha-i point 579 nguteta tasembuba aser tenetbuba jenjang nung eight-woman 24-shot final atema qualify süa liasü.

Final nung ano China tsür Tokyo Mixed Team koker alila Jiang Ranxin-i point 588 nguteta temaba jenjang nung qualify asü. La tanabuba jenjang nung qualify asüla Korea tsür Kim Bomi dang nungi point tenet agi timba liasü.

Parnok rongnung Ukraine tsür la yagi tajungba asaya aser pai point 10.6 ngua liasü, ajisüaka India tsür ana yagi junga metenzükfet aser talisa Esha-i eight-ring nung asemben tashi kashia liasü.

Shot 10 akhaba sülen Anna temaba jenjang nung aser la sülen Olena liasü aser Rhythm o Esha na pongububa aser trokbuba nung liasü.

Shot 20buba sülen Esha trokbubai asepzüka alu ajisüaka Rhythm tasembubai atu aser la Olena point ka aser Anna 2.7 point agi memenepi liasü.

Lai maneni kanga meranga asaya saka point ka agi Ukraine tsür la ya memenepi tasembuba jenjang nung tembanga liasü.

Iba asayamung nung medal anguba ya Rhythm atema kanga tongtibang lir, kechiyong lai tang mezüngbuba Olympic discipline event ka nung senior kija asaya nung medal ka nguogo.

Kasa mapang nung Divya Subbaraju Thadigol aser Sarabjot Singh nati 10m air pistol mixed team tetoktepba nung Serbia nunger tarep Zorana Arunovic aser Damir Mikec na koka gold medal nguogo, koba India atema iba asayamung nung mezüngbuba gold medal lir.

India nunger tarep ya Cairo aser Bhopal nung World Cup nungbo pongububa nung tembang liasü. Ajisüaka iba asayamung qualification nungbo tenati point 581 nguteta gold medal asaya asoshi maongka nguteta liasü.

Final asaya nung tenati Serbia nunger asayar Mikec aser Arunovic na 16-14 agi koka gold medal nguogo.

**BILEMDANGANG**  
"Aija meleshitsüra temulung yirur."